

乾隆歷城縣志

歷城縣志卷第十八

古蹟考五

寺觀

淳暑老子之宮昌黎韓子所謂宜廬其居者也然遠者千餘年近亦數百年且其像設之莊嚴梵筴之藏弃儒之居其宇而守其業者或弗逮焉昔程子是釋氏誦經曰三代威儀盡在是矣其殆有感而言之與故以殿古蹟之終焉

符秦

朗公寺隋名神通寺

朗居琨瑞山大起殿舍連樓壘閣

見水經注

竺僧朗以偽秦皇始元年於崑崙山中別立精舍創

築房室製窮山美内外屋宇數十餘區

釋慧皎高僧傳

仁壽三年正月復分布舍利五十三州至四月八日

同午時下其州如左齊州野鹿來聽鶴翔塔上

集神

州塔寺三寶感通錄

西晉泰山金輿谷朗公寺者昔中原值亂永嘉失馭

有沙門釋僧朗者姓李冀人西遊東返與湛意兩僧

俱入東岳卜西北巖以為終焉之地常有雲蔭士俗

咸異其禎感聲振殊國端居卒業於是天下無主英

雄負圖秦宋燕趙莫不致書崇敬割縣租稅以崇福  
焉故有高麗相國胡國女國吳國崑崙北代七國所  
送金銅像朗供事盡禮每陳祥瑞令居一堂門牖常  
開焉鳥雀莫踐咸敬而異之其寺至今三百五十許  
歲寺塔基構如其本焉隋改為神通道場今仍立寺

云

同上

沙門竺僧朗晉太康中於東岳金輿谷起寺列眾符  
堅之末降斥道人惟朗一眾不在毀倒燕主給以二  
縣租調拜為東齊王魏主晉帝苻秦並致書遠錫至  
今三百餘年寺像存焉現有僧住重其古迹名為神

通寺

上同

仁壽置塔勅令法瓚選舍利於齊州泰山神通寺即南燕主慕容德為僧朗禪師之所立也燕主以三縣民調用給於朗並散營寺上下諸院十有餘所長廊延袤千有餘間三度廢教無敢撤欲有犯者朗輒現形以錫杖撓之病困垂死求悔先過還差如初井深五尺由來不減女人臨之即為枯竭燒香懺求還復如故寺方以來四百餘載佛像鮮榮色如新造衆禽不踐於今儼然古號為朗公寺以其感靈即目故天下崇焉開皇三年文帝以通微屢感故曰神通也初

至寺內即放圓光乍赤乍白時沉時舉或如流星人衆同見井水涌溢酌而用之下後還復又感羣鹿自然至塔雖鼓吹衆鬧馴附無恐又感鷲一隻從四月三日終於八日恒來舉前立聽梵讚恰至埋訖迹絕不來斯之感致罕聞於古瓚具以聞

釋道宣續高僧傳

朗公谷今有朗公寺亦三齊名刹歷代有碑

齊乘

張天瑞神通寺記畧泰嶽之陰有寺曰神通其地隸濟南歷城之仙臺鄉於川為錦陽於谷曰黑風面山曰金輿橋梁曰通聖東一臺臺之上有浮圖為門四為方五西一臺臺之上有鐘鼓樓轉輪藏殿凡若干

楹相傳為古戒壇也又其東有山曰青龍崖下有池  
曰聖油曰聖麵山之南有浮圖一凡若干級其西曰  
虎山有石佛千龕傳聞亦謂為蕭梁時也噫嘻據一  
方之形勝而軒豁昂聳於羣山藁薄中蓋東齊寥寥  
一古刹也第以兵燹之餘雨瀑風摧幾為榛莽適居  
士韓福泰偕其徒莊福宣遊覽其地慨嘆者久之因  
各出其有一切殿宇悉撤而新之大殿二一以供佛  
及十八羅漢二十四諸天一以供五百阿羅天王殿  
四楹伽藍祖師二殿亦如之殿之後為方丈左為禪  
堂又其後為法堂兩廊翼列方丈之左右皆以筵賓

客居徒衆又其西北隅則有龍虎塔祖師林其東有四門塔龍鎮塔在焉肇工於成化丙午三月朔日落成於宏治己卯九月二十一日藏事介余為之記於是乎俾歸而刻之石以垂不朽云

棟碑

神通寺柏樹甚多中有一株上分九枝各枝皆合抱不能交垂蔭數畝土人名之曰九頂柏在四門塔後

棟訪

李攀龍神通寺詩相傳精舍朗公開千載金牛去不迴初地花間藏洞壑諸天樹杪出樓臺月高清楚西峯落霜盡疎鐘下界來豈謂投簪能避俗將因卧病



白雲隈

滄溟集

許邦才神通寺詩百里泰山陰千年號寶林諸天聞  
說法初地問安心古殿松聲合長廊月色深夢醒禪

榻寂清磬下雲岑

舊志

元魏

大明寺

大明湖西即大明寺

水經注

魏明寺

歷城縣魏明寺有韓公碑

百陽雜記

高齊

光政寺

歷城縣光政寺有磬石形如半月膩光若滴扣之聲及百里北齊時移於都內使人擊之其聲杳絕却令歸本寺扣之磬如故士人語曰磬神聖戀光政

西陽雜俎

隋

般若寺東佛峪內

舊志

按明成化間碑云寺創於隋文帝時今考石壁上  
有開皇七年造佛像記則云創於隋者殆不誣也  
湧泉菴

明段雄重脩記稽其所自乃於大隋開皇重脩

據碑

湧泉菴在柳埽東百尺飛流千章古木滄溟有詩

舊志

唐

興國寺

舊名千佛寺在千佛山上唐貞觀建石崖皆鐫佛像

成化四年重修

舊志

千佛寺亦名興國亦名遷祓隋開皇間鐫佛像於山

陰隨石作形

府志

邊貢遊千佛山寺詩二首亭午登山寺淹留夕未歸

涼風起高樹落葉滿僧衣城郭寒烟聚樓臺暮景微

京華十載客愁絕賞心遊

雞鳴春日曉鐘落上方幽樹濕雲猶住山空翠欲流  
酒牀隨客去詩草付僧收虛羨巖樓子坐鑣不可留

華泉集

陸欽詩岱雲烟霧鎖龍宮香閣岩堯翠嶽重狂客偶  
攜青玉杖高僧常住白雲峯瑤燈萬象懸虛照松磬  
千巖起暮春蓮社風流吾所羨宦途禪榻未從容

石少集

劉勅詩數里城南寺松深曲徑幽片湖明落日孤嶂  
插清流雲繞山僧室苔侵石佛頭洞中多法水為客

洗煩愁

舊志

回龍寺王舍店西相傳唐太宗征高麗時建  
興龍寺王舍店東北隅相傳唐太宗建

黃桑院龍山東北一名堯率院貞觀四年建

法雲寺在隱士峪建自永徽初燹於萬歷末

慈氏寺在遥牆武后建嘉靖時重修

開元寺府城內建於唐

按開元寺明初改為府治見危素記

佛慧山寺一名開元寺

開元寺在大佛頭峯下舊名佛慧山寺山半皆峭壁  
壁多石龕鑿如來像旁鐫宋人題名今崖崩不可復

辨府志

李攀龍詩流陰拂層岑返照翳深谷古寺入蕭條廻  
巖抱幽獨梵影靜香臺鐘聲殷石屋絕壁棲禪頌懸  
崖下樵牧秋花雨還瘦老樹霜逾禿寒泉可瑩心白  
雲况極目登臨客自佳搖落時何速疏色蕩腥羶苔  
光清簡牘新詩發神秀舊游耿初服歸來杖履便老  
去烟霞伏高城出睥睨燈火通林麓言旋轉多興後

期此同宿

治溪集

皇姑菴都泉上石塔有開元字

舊志

塘頭寺在神武西南寺前一塔有開元九年字塔東即

倘豆泉

華林寺正覺寺東唐天寶十年建

九塔寺齊城峪唐大歷重修

許邦才九塔寺記泰山北下麓野之間有地曰齊城  
有山曰靈鷲有川曰錦陽峯巒複合林蒼鬱距郡  
邑百里稱異境云寺建於此莫知其始歷考寺碑惟  
得唐天寶大歷之文為古然曰重修則猶非其始也  
意必建於隋梁之間而無稽逮我皇明宏治十三年  
重修九塔寺之碑而寺名有定徵矣今六十餘禩風  
雨銷鑠於是梓或就朽甃或就蝕飾之金碧畫之丹

其類就凋落寺僧了謙惻然嘆曰物無常新功貴有  
繼不有名勝寺曷由興不有繕緝興曷可久乃有其  
役費視其積以匱為期勞視其力以畢為期施聽於  
人無必募成聽於天無刻索經始於嘉靖癸未春告  
成於戊子冬功倍於剏製加於昔則朽者挺如蝕者  
瑟如凋落者煥如燦如於是視瞻儼儼禪梵恬恬鐘  
磬司司旃檀芬芬祈謁而集遊者繩繩關關客歲克  
登詣境斗絕色相岑寂曩霽毫光恍惚時出宜其僻  
而不廢也其塔一塋上而頂九各出構締詭巧他寺  
所未經有故寺名九塔因述其始末云

以上俱  
舊志



李攀龍錦陽川九塔寺觀許右史碑詩名山晴風好  
况復近吾廬嵐影浮斜照茲川錦不如空林雙樹老  
寒塔九華疎一片頭陀石新文六代餘

滄溟集

甘露寺

泉瀘莊東有甘露寺唐貞觀時建今寺廢樵者嘗聞

空中木魚聲

舊志

永平寺

成化元年陳銓重修記寺建於唐距濟南郡城東北

三十里在卧牛山之陽釋性澄重修

據碑

觀音寺

正德八年馬雄重修記錦陽川左岐峪曰齊城寺曰

觀音唐大歷間肇建

據碑

瑞氣觀

祐德觀府城內唐碑云瑞氣觀宋曰天慶金改祐德

觀內古有扁鵲祠金人因創神農廟碑記存焉

齊乘

太清觀

楊宏道重修太清觀記畧金大定間全正之教始興  
遼金遷汴大行之陰洪河之陽士族良民隨之南徙  
散居於秦雍陝洛毫宋壽泗之間垂二十年壬辰金  
潰士民獸駭鳥驚其有幸而脫於獵場之外者姓名

未附於大朝州縣之籍至無所容跡而且有重罪當  
是時也郡邑山林道巷基布智者前為萬簪潤裒與  
道者同志咸免無所容跡之禍嗚呼天也蓋天假全  
正之教為渡人之航於數十年之前而能濟斯人於  
數十年之後嗚呼天也般水鎮在淄齊之間鎮之巽  
維有觀曰太清大定三年名額石刻存焉道士耿之  
沼及弟子王首銳主之師弟子相承者有年矣金遷  
之後戎馬不息相承者竄匿圓極碧瓦委於榛莽之  
中權知濟南府事范智攝歷城縣事馬通主簿張彬  
請臨淵崇源大師劉志蘊住持仍給田三十畝粟百

斛以聚其徒乃始翦榛莽逐蛇豕扶傾覆漏增無補  
款太清觀相傳創於唐毀於宋之季見名額於金重  
修於大朝開國之初師既沒弟子通正子耿志平白  
雲子李志端二人今掌其觀事著雍涖灘十月弟子  
李志端請余記之余欣然為之記

碑據

白雲觀在鑛村相傳建於唐元至元間道士陳志淵重  
修

林泉觀在弔枝山建於唐明嘉靖三十五年重修  
興隆寺

乾隆十八年金祖靜重修記歷城東黃石莊有興隆

寺唐時舊刹也

# 大聖院

王繪大聖院記衆生以三毒業流浪生死海中盡未來無有已時西方聖人大慈大悲憫念有情廓為法航濟而扶之厥功大矣雖雙林示寂入般涅槃而應念化身至千百億譬如清淨水中月體皆現謹按濟南圖經老僧口鎮在聞韶驛東北七十一里後唐清泰二年建本小清河渡口嘗有老僧坐化因此為名又耆舊相傳有入滅老僧結跏趺坐沂流而上若鳬鷖然至是遂止緇素神之相與遷置圍繞讚嘆希有

以謂茲必聖賢權化警悟羣迷乃構厦奉祀水旱祈禳皆有應驗此大聖院權輿之事也宋政和二年有旨自崇寧以前修建堂宇間及三十者特許存留住僧省靜以是訴於縣縣以是聞於府府給據付之至今以為證焉三年省靜以年耄請賜紫沙門智通住持智通為人質直精嚴長於梵咒眷言是院多歷年所其宇摧敗其地褊隘竭力化緣創建增葺大殿法堂寮舍庖庾塑佛一龕冶鑄洪鐘以警昏曉增葺鄰壤以崇垣墉度小師七人廣興廣文廣德廣峻廣實廣先廣寶濟濟踰踰皆有學行智通既老再傳而廣

峻佳之又再傳而廣寶住之近年以來昧者顯敝者  
振雕木莊嚴六師佛像丹雘粉澤金碧相照魚板鐘  
磬歌唄潮音琅琅不絕者皆廣寶住持之力也昔在  
皇統九年繪就試迴待榜之次胸次芥蒂一日先妣  
太君田氏謂繪曰昨暮夢自絡絲於張絲竿上火起  
方驚愕間忽見南寺大聖忻然而言汝子今歲必了  
此吉徵也不數月捷報登第式符其夢太君遂施僧  
伽黎衣以答靈貺嗚呼自非慈悲妙用福佐一方安  
能現化如是哉繪欲顯聖賢之靈跡故因書石云讚  
曰臺城之北灤水之陽鎮號老僧肇自後唐聖賢以

化於赫靈跡坐亡泝流理不可測緇素神之建立道  
場用作佛事基構漸昌歲月綿遠其詳靡紀所可見  
者省靜為始智通廓之廣峻承之或卑或陋廣寶營  
之棟宇彌壯像設益儼金碧莊嚴光輝冉冉樅樅不  
停茲芻有歸福佐一方法雨霏霏後之嗣者守宜無  
失刊諸翠琰永戒無極大定二十八年三月十五日  
少中大夫保德州刺史兼知軍州事王繪撰

以上俱  
基碑

### 五代

禪靜院龍山鎮北建於後唐始名新禪後名中禪宋治

平初名禪靜

舊志



王敬重修記畧金僊氏之教皇元崇尚尤甚濟南般水鎮之南有院曰禪淨考舜院之斷碑謂肇建於後唐始名新禪後名中禪宋治平勅其名曰禪淨迹名求實始其禪院歟源遠流分離為異門遂為教院院之主僧寬公大師禮山康大宗主汀溝淳公受法淳公之門學者百數莫之或先先是院闕前殿師乃經度營表掄材督工檀那之主不慮德色率皆懇布樂施不勞餘力而殿以成因據其實而書之

據碑

水月禪寺北門內東祀觀音晉天福建

舊志

王士正汎湖欲訪水月禪寺不果詩二首水鳥說七

佛偈霜鐘轉百法華五十六年如夢阿誰解算河沙

予以順治庚寅居此今五十六年矣

一笑世經千偈久署亭名四休又別湖中魚鳥七橋

幾度回頭

錄尾續集

洪福寺中宮東天福間建

舊志

宋

大菴一名長春觀

正德三年重修長春觀記廢井中獲一斷碑有大觀五年初建字又有元至元四年八月提點高道謙知觀馬德逸重立之語宏治甲寅有義官蘇安鄉耆劉

春薛謙王如山陳鳳伯修至正德庚午鄉人李海慨  
正殿之傾且敝竭力新之

據碑

嘉靖八年道士任永貴重修萬歷四十五年劉伯綬

重修

同上

長春觀西門外邱處機修正處殿後平地一洞蜿蜒  
數十里名為長春洞今没入民家一名大菴

舊志

鍾轅長春觀詩灤源數武吾比鄰直北道觀名長春  
古殿歸然地宏敞朱甍碧瓦如嶙峋翠栢槎枒多丈  
納之而蜿蜒虬龍蹲玉案玻璃注淨水虔供閭苑清  
虛神丹書金籙肅壇醮彭彭法鼓過昏晨愧我就居

幾二載終朝碌碌埋風塵偶爾行鉢避炎暑姑作半  
晌逍遙身欣逢叔度家二妙才思卓犖顛斷斷入座  
方瞳老道士黃冠白葛烏紗巾呼童汲井設茗具相  
將古蹟閒究尋刺刺僂指為予說斯觀自唐芟荆榛  
別號大菴我鼻祖元朝東海邱真人餐霞服日調胎  
息歲早祈禱無其倫殷七七花紅似錦許閒閒永白  
於銀迴廊左側穿洞口羊腸委折開迷津南山之南  
百餘里洞尾小菴栽松筠大菴小菴相映帶琴高赤  
鯉來回頻厥後尸解何處所天涯浩渺懷先民元都  
在昔桃花盛免葵燕麥今沉淪憑弔當年共太息摩

泮石碣苔錢皴吁嗟仙家猶物化大塊為主僕為賓  
世間萬事皆如此誰非假假誰真真蒙木集

按碑有大觀五年初建字詩內自唐云云恐訛

鵲山院

按陳師道登鵲山詩一作鵲山院詩見山水考

王革同錢翁遊鵲山寺詩今年客滌口兩過鵲山寺  
來春放脚處一迳酸風吹山徑石華確畧徇自孤寄  
寺門黃葉深羣客入蒼翠相將囑空王低眉非無意  
豈惜租穩人顏色為顛顚顏面老比丘策杖揖客至  
茶烟疊數縷寒花紛相次樹轉夕陽黃促迫別開士

何當雙鶴翁拂蘇尚題字出寺蝙蝠飛冥冥蕩情志

二十四泉

草堂集

朱懷樸登鶴山寺閣遠眺詩濟灤來王屋九點峯楚  
楚碧流灤寺門樵風送寒雨上方秋氣深雙樹映孤  
嶼初地意蕭寂古像留紺宇巖壑靜塵心松竹護茶  
塢幽禽鳴空林黃葉積廊廡涼吹送夕景搖曳塔鈴

語

山民集

劉伍寬題鶴山寺詩燕子飛相引飄然至上方松風  
圍古殿花氣撲香堂解帶塵襟潤登樓澗壑涼機心

猶未息一局午陰長

此亭集

東嶽廟

曾鞏嶽廟祈雨文去歲之早有請于神蒙畀嘉澤田  
則大稔今春河役發民二萬更迭齋送衆又倍之蓋  
此齊人出者幾半迨其返室維夏之初勞費既深又  
違穡事夫民數歲乃遇一稔敝之如此其幾尚完今  
二麥方包而亢陽為虐吏任其咎所不敢逃惟民何  
事賴神終惠能致雲雨則實在神尚其念之

南豐  
類稿

李珪重修東嶽行宮三門記畧歷山下有岱嶽行宮  
辛丑春三月有本觀住持道人充濟南路道錄李福  
道同老杜公法師等就基址重修癸卯秋八月帝宮

正室成有本府錄事司首領董俊龍水利針筆王澤  
社官雷澤同本觀住持道人正授圓明元悟正人法  
旨充濟南路道判周福正姚士英就正門故址於至  
正十七年三月間啟土民願施者踴趨之尅日而成  
并帝之宮室完禱益新却有油麵王德同妻翟氏管  
鈔一百五十貫作門戶并裝飾爰書其事於石據碑  
周維貞重修東嶽廟行宮記畧歷城城南嶽廟劫火  
之餘基址是存重修建於前至元十七年近自至元  
庚辰有山東都轉運使周太中以課辦公務之餘為  
民祈禱遂割俸繕完煥然一新時則有提點張公輔



壽躬率其徒勤役相助遂能允成是不可以不紀  
施閏章重修東嶽廟記古之事神者祀而不瀆敬神  
而不聽於神自天子至庶人各有祀典非其所祭則  
不敢祭所以明禮辨義也泰山為五嶽長書稱柴望  
岱宗巡狩於是乎始蓋天子所有事也其在境內惟  
魯侯得祭季氏禘舉孔子譏之況其下焉者乎是以  
古者五嶽視三公未有封號其從事泰山者有祭告  
而無封禪封禪之說著於管子而所稱七十二君殆  
不可考自秦漢迄唐宋好言封禪用是有宮觀祠廟  
之役且人其神而帝王其封號矣明洪武間始正其

名曰東嶽泰山之神有大事遣使奉天子冊書祭告  
雖未舉巡狩之典而與古柴望之義一也今去古益  
遠祭義不明俗尚禱祀士女重趼累繭影赴響臻趨  
事泰山無虛晷崇廟飾宇史巫紛若以覬覦其所欲  
得不幾以神為市乎濟南府治去泰山百里而遙所  
在多祀嶽神城南岳廟為甲昉自宋元歷明宏治萬  
歷增修至再崇正己卯災前提學余君倡義募修年  
閱二十費累鉅萬復其舊而廣之朱甍碧瓦榱棟巍  
巍左右層宮複殿羣神畢祀兩廡列諸寘曹善惡狀  
見者竦然髮立余秩滿將歸道士任德志及諸父老

可文以記余乃昌言於衆曰此古天子柴望之所先  
魯侯之所守祀而大夫以下之所不得祭者也若母  
以神食於我而謂神之假易也夫擇災禦患出雲為  
雨有功德於民者皆祀之所以答神貺也非諂也書  
曰惠迪吉從逆凶皇天無親惟與善人易曰積善之  
家必有余慶積不善之家必有余殃詩曰懷柔百神  
及河喬嶽福善禍淫天之道也敬鬼神而遠之智者  
之事也帝出乎震震東方也萬物之所始也岱為東  
嶽出雲雨不崇朝徧天下而此邦為嶽麓被澤尤先  
且厚宜不敢忘神之賜今竭力致誠雲集雷動入廟

中尊之如天地親之如父母畏之如雷霆可謂敬矣  
其反而思曰某事也善可告神某事也不善神必怒  
我恐懼修省相與薰為良善去其矯誣以告無罪於  
神夫然後風雨以時苗患用息豐泰稷而穀士女神  
所憑依將在是矣不然瀆神求福鬼瞰其室若母以  
神食於我而謂神之假易也諸父老聞之憬然曰善  
遂書其辭為記順治十七年歲次庚子秋九月據碑

壽聖院

英宗治平四年正月辛亥詔民間先私造寺觀及三

十間者悉存之賜名壽聖

司馬光  
稽古錄

龍洞北崖山如疊甃峯若城墉崖間有金刻勅龍洞  
盡聖院六大字為蘇軾所書下有寺即古院也

舊志

蘇轍齊州祈雨雪禱龍洞文惟神出入造化呼召風  
雲播灑甘澤膏潤下土今茲歷時不雨麥不得種饑  
饉既至疫癘將起守土之吏知任其憂而不知所為  
神能仁愛斯民又能作為雨雪以生育萬物是以敢  
告苟克有應嘉雪時降以寬吏民之憂敢不有以報  
也尚饗

樂城集

李元膺順應侯碑記事有不相及而相資者天人之  
勢遠矣人所播種而天為之灌既此豈理之可恃者

入其遲速多寡必如人意而後可今引機以灌園猶  
未必皆能以時而況驅風馭雷神龍之所變化而必  
欲如我節度此民之所以多怨而不合也古人於其  
力之所無如之何而為之祭祀禮文以寓其精誠之  
至以為誠之至雖遠而無不及而荀子曰雩而雨何  
也猶不雩而雨也夫荀卿氏好為異論以其一夫之  
所見而廢歷古聖人之事其亦不思而已耳今所在  
山川之神能出雲雨以利賴一方答民之求如響者  
蓋不可一二數是又可盡誣也哉濟南自春不雨夏  
五月旱氣彌甚通守何公攝郡事不忍斯民告病為

之瘠食求可以致雨者百術並用最後禱於龍洞乃  
旋日而應郡人皆以公至誠所致公曰民則無罪而  
神所憐也我何有焉乃卜日率屬吏冒大暑往來馳  
八十里以民意告謝先是歷城令歐陽大春夢旌旗  
戈甲與衛甚盛云是順應侯見大春正色曰吾受天  
子封爵而制書吾不得見何也大春深駭之不得對  
覺而語其夢同僚莫有知者久之待於州軍資庫中  
塵埃敝壞乃元豐中守臣韓鐸以侯之事請於神望  
帝而賜者蓋於今二十餘年矣公既以禱雨而應又  
得茲事異之即歸制書於廟且購大石刻之立廡下

而謂法曹掾李元膺曰神之事彰彰如此不可無所  
述恐久而遂以泯滅欲子之文以傳於後吾將並刻  
之元膺敬惟順應侯功德在人秉筆之士固願有所  
述也而龍洞為東方勝處亦欲見於文字而踰年於  
此願遊而不得既以祀事從公始獲一覽其勝巖石  
奇峭殊不類他山山行六七里岡嶺重複初若無路  
而境轉輒復恍然所見益奇自三秀峯之後四山回  
合皆壁立萬仞如削金鐵而巨石危峯橫出倒挂虎  
脫其顙龜瞰其首崢嶸竦屹如欲飛墮此天下之奇  
說也世言昔大禹嘗登茲山起蟄龍以理百川至今



民間猶謂之禹登山洞在山之脅其大如屋其深十有八楹視之窈然嘗有風氣觸人此固神物之所宅也天子既加侯以龍光而守土之吏又為之崇飾侈大以播侯之美於天下侯之美亦大矣侯其無替靈德時其雨暘以大庇斯民於無窮民亦得以簫鼓牲餼奉侯之祀益遠不懈其不亦休哉元符三年六月十三日記

據碑

張泰亨新修龍洞靈惠公廟記自古齊州東方一大都會也近改曰濟南府府治之東南行三十里許山益峻路益口口口盤折自西而少北阨入深谷叢薄

覆翳似可容足其間懸崖絕壁突兀萬仞層巒疊嶂  
蒼翠如畫有曰錦屏嶺者有曰演老嶺者有曰三秀  
峯者有曰獨秀峯者口口山也山腰半空洞口呀豁  
陰飈盪胸晦電擊目近之則不覺使人毛髮竦立者  
乃龍洞也洞之石或有時而雲曾不膚寸倏然而變  
黢洞之泉或有時而雨曾不涓滴忽然而霏霏若非  
神物是宅其變化之狀其能如是之速耶山之下有  
古刹焉名壽聖院而龍洞寓於其中方膏雨不時禱  
無不應在圖經文字皆所弗載逮夫宋元豐間有太  
守韓鐸者因冬禱而靈尋奏乞加封號以答神休蒙

錫以侯爵曰順應順應之異迹已見於元符中通判  
何維碑陰記厥後進封以公爵曰靈惠靈惠之封不  
知始於何代何年耳止於獨秀峯下有石刻題曰南  
陽韓公美禱雨於靈惠祠時皇統辛酉暮春十三日  
也皇統蓋前金之年號自宋季迄於金亡百餘年間  
神之靈驗無復聞焉國朝奄有天下州縣皆世其官  
我濟南路大行臺清河公先以年高引退傳爵於其  
子蒙宣授濟南路都總管民長官者卽嗣相也嗣相  
在庚戌歲方北覲闕廷未回值春夏大旱穀價翔貴  
民有流亡於道路者一日大行臺公召叅議段徽辭

府泰和謂曰早既太甚無術以可救嘗聞諸故老曰  
府南龍洞山有龍洞至靈吾老矣不能行禮汝等其  
往禱之無怠於是府司僚屬廼具禮以祠是夕大雨  
盈尺明日雨亦如之衆皆入賀於公公曰神貺之孚  
我何預焉若輩思其所以報之之禮當如何哉僉曰  
昨見神宇庳陋貌摧毀其不副邦民瞻仰奉祀之  
意若能一新之不惟少慰民望而神之格思亦莫不  
喜公曰然乃命官鳩材僦工使匠氏輸其能役夫竭  
其力不日之間新廟奕奕神像赫赫金碧璀璨煥然  
可觀公乃率羣官具牛醴以享是歲百穀豐登卒滿

西成之望焉無何至今歲甲寅春夏之交雨復愆期  
麥將秀而半枯穀欲種而未下衆口嗷嗷靡不愁嘆  
適嗣相以不可風之疾未起視事廼命世子開躬詣  
靈祠以禱之是時簪纓多士問巷細民縉黃坐覲之  
流耆艾童孺之輩偕陪從以祭既歸路未半沛然而  
雨三日之中甘澤霑足物以是生民以是喜翌日復  
往謝之如初禮已而世子謂幕守張泰亨曰是雨之  
降也民皆歸功於我我豈敢當之哉是豈知皆吾祖  
吾父潛祈默祝之心使我奉行之致有如是之應耶  
今已令歷城縣錄事司官春秋修祈報之禮以為恒

典凡廟之制度未備者悉加修飾又欲礱石以記之  
使千秋百祀而下咸知神之德有應於人亦使知吾  
祖吾父之德有感於神也君其為我文之無口余因  
拜手而言曰夫大而天地幽而鬼神微而昆蟲草木  
之類若以精誠之至動之未有不影響而應之者  
而況妖祥之致休咎之來莫不一根於人心雖旱災  
天數也古所不免如成湯禱桑林而自責宣王望雲  
漢而益懼皆能以誠心致感曾不旋踵轉禍而為福  
矧餘人可不如是乎今世子銜父之命深民之憂徒  
跪奔走曲拳擎跪而哀告於神明神其應之也如此

不亦懿乎故祭法云山林川澤能出雲雨者則祀之  
有功烈於民者則祀之今靈惠之功於斯民也非淺  
矣其命有司以歲時致祭其報之也亦不為薄矣若  
夫始接之以誠終事之以敬誠與敬惟君子能盡之  
世子之心可謂始終無愧矣然而當薦饗之期犧牲  
豐腆粢盛精潔雖百禮孔洽苟不揄揚神之休德以  
侈其賜神其饗之哉所以載芟良耜之詩播於周齋  
房象瑜之詩興於漢茲亦宜作迎送神之歌以侑祀  
事庶神聽嘉之福我齊土之民無有休已也故繫之  
以歌其辭曰口路盤曲兮山之隅林麓晻霭兮神所

居神之來兮風徐徐雲幢烟蓋兮羅前驅陽侯執轡  
兮列缺捧輿電不搖幟兮雷不鞭車亦既至止兮士  
民敬趨擊鐘鼓兮吹笙竽獻嘉肴兮酌清醕陳牲奠  
幣兮翼翼愉愉自今以始兮歲不虛神安寧兮樂有  
餘時暘時雨兮咎徵悉除多黍多稌兮豐年可書民  
之昭事兮禮不敢廢神之陰施兮福亦來儲棧碑  
黎國器重修龍洞聖壽院記龍洞距歷三十里許四  
山廻合若無路然由山口而入巉巖危峯四壁若削  
且丹碧點綴絢若錦繡故一名錦屏山山脇一洞門  
蘿上之其大如屋其深十八楹可明火而遊洞下為



靈虛宮早禱輒應宮北雙壁若劈水澌澌中出曲行  
數里為黑龍潭雲氣簾揚渺焉際空蓋神物所宅也  
在勝國時尤崇異之珠宮寶剎金碧相輝清梵鉢聲  
響振空谷勿論持辦者錯趾跨酒瓢而遊者輪蹄不  
絕蓋達人之大觀也即如我朝肅穆之世殿宇依然  
山不改色青衿且多卒業於斯迨神宗卯辰之祲盜  
賊沸起僧不能居而一切盡屬烏有已未秋余同唐  
郡丞禱雨立應竊有志焉而束於吏法未敢首事庚  
申春中丞王公侍御陳公觀風過此見其山勢奇絕  
相顧而嘆曰田海陵谷代而變遷時和物阜桑井亦

太平之觀財盡民窮山川皆黯淡之色景自天開物  
由人勝我輩寧無責耶遂捐俸三十金大為修葺其  
有未敷余以俸錢佐之自大士殿以及山門皆煥然  
一新復建圓亭者一俾酒遊者有所依由是山若增  
而奇焉不越月而事竣矣昔李格非以園囿之興廢  
卜雒陽之盛衰名山從此吐氣則歷下其興乎是役  
也兩公豈獨留心景物已哉

據碑

周有德重修龍洞靈惠公廟碑記畧康熙三載之間  
民用大和予以癸卯秋出撫茲土越明年甲申夏六  
月不雨爰命有司修大雩之禮公偕予致齋步禱者

久之雨未至聞諸父老云會城東南三十里有龍洞  
山相傳宋元時所祈輒應遂率百職事吉蠲以往祈  
禱甫畢雲氣驟合歸及半途大雨遂至翌日又雨四  
郊霑足鼓舞載道顧仰瞻廟貌既庠且圯何以答神  
庥而崇祀典於是鳩工庀材不趣而速唐皇既闕兩  
廡異如規制宏廓倍於其舊八月民以有秋告而新  
廟落成夫斯廟之創不知何代考諸羣籍宋元豐二  
年守臣韓鐸以祈雪請於朝始封順應侯元符三年  
通判何維禱雨刻其制書於後其晉爵為公改稱靈  
惠則見於金皇統韓公美禱雨題名至元總管張開

三世守齊復以禱雨令叅議張泰亨記其事碑猶  
存焉與今日之事若合一契予讀而嘆曰神人一氣  
也此以誠感彼以誠應孰謂古今人不相及哉百執  
事請礮石為記敬拜手而為之銘康熙三年歲在甲

辰秋九月吉旦

據碑

范瑟遊龍洞寺詩荒寺丹青古寒泉野殿深龍游天  
表去洞向石巖陰座外明珠水林間聽梵音何時起

支遁相對法華吟

釋志

李攀龍游龍洞寺詩壁削芙蓉萬仞丹禪林隱隱畫  
圖看人間勝地僧多占洞裏諸天客到難雲傍龍來

晴作雨風從洲底暑生寒年來曉有烟霞癖石畔長

松好挂冠

治洪集

張穆游龍洞山寺詩千巖萬壑路縈迴却度前峯寶  
殿開四面好山疑禹鑿半空飛瀑自天來雲歸洞口  
龍初蟄雪滿松枝鶴未回共道塵寰那有此臨岐上

馬重徘徊

石刻

報恩寺在龍洞東峯元豐二年僧宗義建

舊志

淨居寺東開外肇於宋毀於元重興於明

會仙寺平陵城東一名東窪寺宋建元修

雷音寺史家塢一名釋迦院宋建元修

朝陽寺城東南六十里宋大中祥符初建

以上俱舊志

### 興福寺

王綸重修記畧寺肇於宋毀於元季兵我朝僧修忍等復修之宏治乙卯秋七月立石

據碑

### 彌陀寺

成化五年重修記畧歷城之北華山之陰逾大清河鄉名南會清寺曰彌陀創建於宋之時今二百餘載檀越郝安崔祥謀更新之經始於成化丁亥三月落

成於今年八月

據碑

劉伍寬訪彌陀寺詩行脚小乾坤沿河問寺門霜風

催木葉野水落堤痕勝地餘殘碣浮生慚世尊歸途

猶未晚回首識前村

海右堂集

永興觀柳埤東南大定重修今名岱家菴

德志

元

靈泉菴在金線泉上

見濟南行記詳山水考

呂公祠

元遺山在太原有道人嘗邀同食且曰吾家在濟南  
趵突泉上甚可樂也子能從吾遊乎元曰有待數年  
後遺山過濟已忘前約矣游泉上倦卧灤源堂忽夢  
前道人揖之曰久約不相憶耶何咫尺不枉顧醒而

始悟因起過北岸入祠中儼然座上矣因為重建此

祠

舊志

按濟南行記不及此事舊志不知何據

呂仙閣在趵突泉上平視千巖下臨巨壑泉聲漱玉

六月為寒

府志

天齊山神廟在府城內

齊乘

按漢志濟南國治東平陵有天山郡南山也以其在

齊故曰天齊

同上

清河寺河趙圈東北元修

舊志

正容寺藍家莊東元修



龍泉寺唐王道口元修

華嚴寺馬蹄峪元建今廢

平臺院老僧口西南元修

清寧寺城東北五十里中統間重修

興教寺箭桿裏中統建

華嚴院在南寺莊至元間重修

丹陽觀一名大菴馮中和修正處至元年建

南泉寺在中宮東南元至元中重修明萬歷己卯許邦才重修

許邦才重修記南泉寺在省會南四十五里中宮之

東山陰之半寺迤南山泉三四泓冬夏不涸故名其  
昉蓋久而不可詳但南崖巔有石刻至元重修字乃  
知不始自元矣至我朝正德時重修已磨石未刻而  
其人已不可考及萬歷戊寅予以老病火馳求就陰  
之地以息乃市寺僧房地一分相度經營之宜則殿  
宇類做像設汙殘長太息者久之因語寺僧曰是任  
將安諉哉於是命工鳩材埏埴既稟次第修葺至己  
卯春正月告成而寺視前改觀矣寺僧湛徹等募緣  
遠近善信多所施助具有名氏恐久而磨滅先於南  
崖得石請紀歲月及歲之三月來山村齊居因為叙

述而綴數語於左方詞曰東岱良趾列剎相望寺以  
泉名其源蓋長始自王屋匯為清濟經河伏地紆迴  
千里乃於是中瀉為泉泌自南暨北七十有二曰都  
曰醴曰勞曰糠在彼南山實為濫觴寺有廢興泉無  
絕續因泉名寺實有攸旨爰惟此役有其舉之我來  
匪暮殆俟厥時元度前身安知無自似於今日了未  
了事

迎祥宮在府治西南元至元十年建明永樂中重修  
岱嶽觀南門外嶽廟東大德重修

栢山寺在展村西至正間重修

以上俱  
舊志

嘉靖四十年李賞重修記畧云寺不知肇自何時元末毀於兵燹正統丁卯僧行堅重建成化間鄉先生中丞張公鴈讀書其中為時名臣學者因稱栢山先生自是而後如閻函麓錢梧史趙雙松劉近峯徐北塘何月巖趙陽名賈奇峯趙一元一貫周化中周之紀李茂華趙時煦馬宇謙皆讀書此山而有聲於時

據碑

醴泉寺在中宮南一名四合至正間重修

舊志

釋迦院一名汀溝院

同上

釋智登重興釋迦院記畧釋迦宗主忘機顯教大師

諱福淳干其姓河間路滄州樂陵縣人至元八年尋  
勝至歷城之東三十里汀溝古址曰釋迦院樂其遠  
器塵駐錫為歸宿之地竭力營修制度俱新又罄餘  
帑藏剏良田以可菽置畦圃以可蔬常住歲計及十  
方雲水之給至是足矣嘗從師聽講見師議論風湧  
出入三教貫穿百家其言文而正其行峻而通遂為  
擬其實而筆之

據碑

升果院在董家莊至元重修

舊志

王炤勝果院僧明通勒績碑記畧濟南雄藩甲於河  
朔路治之東五十里無影山其下有院曰勝果院興

自榮公山主殘金滅時由河南行脚至此卓錫功德王大檀那縣尉孫福巡檢曹誠張都統馬千戶衆等同發善心創建後數十年殿舍崩摧孫顯曹政與當時嗣院事僧文輝重修厥後數十年至知院僧明通觀殿宇傾圯輒發虔心鄉村耆老悲欣然嚮應經營之始逮於落成不閱歲而畢約費楮幣萬緡有奇據碑康和尚院明初改為鎮安院又名鐘樓寺

鐘樓寺府治北僧綱司舊在正覺寺成化間移於城內鐘樓之側建佛殿藏經殿為別院因鐘樓遂名舊志

鐘樓寺大明湖南後改湖南書院已又改為提學院

公署

同上

陳修鎮安院鐘樓記畧在天齊昏曉者惟日月在人  
事齊昏曉者惟鐘鼓故藩服郡縣皆置鐘鼓剖昏曉  
齊廢政濟南扼齊魯之要衝當海內之劇郡洪武建  
元天兵下斯土闌閭之廬舍釋老之寺宇一無所毀  
是歲山東行省提刑按察司皆設於此焉冬十二月  
修躬承德音出牧茲郡時有旨建有司公解明年已  
酉二月修到官經營之顧開元寺基高爽舒廣乃稱  
圖式遂大興徒役府治適成舊有鐘樓居府之左翼  
群民咸請移置他所以工大力難未許會三年上以

屯田召守臣入京廷對七月修還郡父老所請益堅  
集章邱鄒平二縣夫二百餘人木石瓦礫悉皆宿餼  
旬月鐘樓遂成去府治僅一里與鼓樓峙立飛甍曲  
桷丹雘焜煌露箔風鈴低昂有次萬家之衆勉勤作  
業朝夕聞鴻音於星月之下以樂雍熙之世豈不偉  
歟樓用康和尚院舊地築臺三層上立棟宇四級葺  
舊殿若干楹移梵王相改名鎮安院相是役有成者  
推官姑蘇丁公英經歷盛山陳汝言知事雪川莘景  
尹脩不敏請以是為記時庚戌洪武三年冬十有一  
月己丑初吉立石

據碑



衛既齊重修鐘樓記畧歷城之東舊有鐘樓考於邑  
乘相傳為鐘樓寺歲時久遠日就頽圯康熙二十有  
八年余乃作而新之庀材鳩工擇吉創始未幾而樓  
巋然步欄周流長廊四起高覽遐矚山水人物城郭  
邑居之盛鱗次坐湧於眉睫間樓與鼓樓對峙洪鐘  
在縣考擊相應於以辨晝夜之候嚴啟閉之節亦都  
會所宜也

府志

孝感寺明初改名太平寺

太平寺在府城內西寺前有孝感泉匯而為池曲折  
引流入僧厨復流出垣達於北渚正德間重修德府

出內帑助成

陸地志

元孝子劉琮捨宅為寺以得金名孝感後鐵方伯於

中貯兵甲改今名

齊音

湖旁有寺曰西寺一名太平寺

天下名勝志

鄒襲修太平寺記畧濟南在城之寺有三太平寺其

一也山門佛殿翬飛爰立後有修竹千竿拂雲蔽日

盛夏不知炎暑為棲佛奧區都綱至昂之所為也至

正德丁卯六十餘年風雨震凌漸至頽圯德府內官

楊玘重修大殿東廊木府醫官張雄乃語承奉正鄧

芳啟於賢王殿下即出內帑若干再修西廊凡其所

居狹者闢敞者新經始甲戌之夏落成丙子之秋故

詳記之

據碑

明

正覺寺舊在府城內永樂間移置舜田門外

陸通志

寺舊在府城內名曰開元國初更名鎮安院正統間

勅賜藏經成化間移舜田門外始易今名崇正壬申

火藏經雖毀大雄殿獨存僧綱司今在其內

舊志

光盛重修正覺寺記畧歷城出自歷山門轉而西三

百步舊有寺曰正覺蓋自勝國之前至元九年府城

之內有寺曰康和尚院迨我朝洪武之三年更名鎮

安院至正統十年間則嘗奉勅命頒賜大藏經時之  
以肄僧徒後成化十一年德莊王分藩我濟南唯此  
刹適當府志前壇壝處有司始計值遷正覺寺是役  
也增其式廓眎昔而既張矣百年來日就圯壞都人  
士馬進良王宗仁王志皋季秀周居寶周居珍等僧  
能敬法辨德淨等僉謀新之未周星告成事已二三  
子索余言余聞之曰天下同歸而殊塗夫覺性一源  
歸之同也因應變化塗之殊也既白頓漸乖而權分  
根塵結而境亂世儒惑於末流不究歸之同而病塗  
之殊猥云佛氏異端此與以耳食何異余自弱冠睹

貝葉則昏昏莫辨既壯有所聞則心開然而遭口語者數矣因正言之以明至道時萬歷十四年歲在丙

戌秋八月

據碑

玉泉寺在龍集山一名果老菴正統十二年重修

據碑

元帝廟

尹旻重修元帝廟記畧我德藩賢王之國以來上下奠安乃於宮北土山之陽建北極一廟歲久傾圯於是慨然增修規制視昔有加地乃白雲樓舊基遠有佛山之巍巍近有源泉之混混背有明湖之浩浩旻老矣不能文謹跋數語於碑因申臣子頌禱之意

舊志

圓通寺在趵突泉西成化間尹恭簡修建

北極廟在北城內迤西大明湖上祀元武亦以名臺

劉天民正武廟啟聖殿記畧濟南城城北會波門舊有  
正武祠枕其上據城而言適當元武之方又水宅幽  
隱龜蛇爰妥望之鬱然有靈氣成化初年我德莊王  
封藩於濟歲加葺理既崇且煥繼今王嗣位靖恭有  
服祝釐飲福之暇勤恤民隱聞道家者流謂神有父  
母宜更崇一字以棲神止王遂從之別為殿四楹繪  
像以祀是固未可輕誣有神而一念愛民憂國之雅  
良可欽也愚不敏因序其事爰作迎神二曲云望望

分丹青冥冥兮元圃神之格兮無射靈之萃兮惟祐  
庭奏兮九韶階陳兮萬舞滌蕩兮冰漿羞鳳麟兮  
醢脯篆寶幄兮流氛湛金盃兮椒醑騁極目兮招搖  
想容與兮羈羽神來兮無繇紛藻蓋兮璿旂儼帝降  
兮黃收駐仙馭兮紫邱森宸府兮水衛明御仗兮天  
矛受王國兮祈福撫庶士兮總繇時燠寒兮歲熟銷  
兵火兮民懷願眷命兮用懋冀中命兮用休以上俱舊志  
王慎中游大明湖晚至北極廟登覽詩春城足遐觀  
攜手復嘉客欲極高深趣停橈理輕策林木飛鳥還  
蒼茫烟景夕返照射巖丹遙空烟水碧山色晦彌明

人聲喧更寂燈火起閭閻漁樵散原澤當歌浩思盈

對酒沉憂釋不知驩娛滯天表生皓魄

遵嚴集

劉勅北極廟詩廟貌鬱崔嵬溪雲護法臺凭軒雙目  
豁倚檻萬峯來樹影孤帆動香烟古殿開喜看載酒

者一棹任徘徊

舊志

高鳳翰夜月泛湖登北極臺詩孤臺鬱起水雲間上

界仙宮迫閑關袖手人依清漢立凌空心共野鷗閒

花香高沁天心月夜氣平沉郭外山呼吸正堪通帝

座滄浪歌罷不知還

南埤山人集

文昌閣在羅家寺山前成化間建

舊志



三官廟

任文獻重修記城南三里許古有三官廟正德十一

年乙亥重修

據碑

天青菴在史家塢嘉靖間建

舊志

雲臺寺在桃花嶺東一名天井依澗築臺依臺築寺下

有甘泉石閣重重盛夏無暑

同上

李攀龍詩古寺馬蹄前荒山斷復連階危孤石倒崖

響亂泉懸喬木堪知午迴峯欲隱天不因許元度誰

得此攀緣

潘演集

許邦才詩千峯寒色照嘯裘歲暮還堪載酒游初宿

南巖天井寺便聽一夜石泉流

舊志

月陽寺在黃臺山上隆慶三年重修

藥師寺在權富莊萬歷間建

十方院在南門外萬歷甲辰建

廣勝菴在小教場萬歷間建

淨業菴一名雙橋寺在壇閣北萬歷末建

星宿廟在南門外萬歷末德府創建

藥王廟在趵突泉西萬歷末孫方伯承榮建

劉勅藥王廟記畧夫穀以養生藥以療疾所從來遠矣昔孔子每飯必祭今世藉刀圭扶衰病而不祀及

先代治藥之人報本之謂何方伯孫公善病每病藥  
即起於是蠲俸錢為一字於酌突泉之干肖神農於  
上以岐伯韋藥王配之而雷公秦越人長桑君淳于  
意張仲景華佗王叔和皇甫士安葛洪孫思邈列於  
兩廊採山合治毫不煩民間甫閱月而告成焉且治  
地一區以供黍稷乃屬記於余余因為之記曰古醫  
師掌醫之政聚毒藥以供醫事歲終十全為上十失  
一二次之十失三四為下至鄭重也今之醫明不辨  
寒熱平毒之性知不諧君臣佐使之法惟以情度病  
多其物以幸有功譬蠶不知免廣絡原野以冀一物

之獲寧不為古名醫之罪人哉於是知今日之役又

匪第報本已也萬歷四十三年歲次乙卯月日

大佛寺在八達嶺下寺去嶺三里佛去寺七里

渴馬寺在西渴馬莊崇正初重修亦名玉泉

萬善寺在鵲山下崇正乙亥曾司璣創建

普門寺在道溝內崇正十年張洪重修

梵音寺在龍山鎮明朝建

安閭寺在譚城驛東北一名草寺明朝建

以上俱舊志

三元宮

王倣大佛寺重建三元宮記畧自歷山門出彌望皆

山林其峯巒之糾結雲樹之掩映入愈深景愈奇迺  
峭壁懸崖猿攀蛇緣人行樹杪去城若干里有寺曰  
大佛谷深土肥泉甘草茂余二子賞其靈秘讀書於  
此時亦有棲正緇黃隱見於朝烟暮靄間釋太正飛  
錫而來依樹梵唄積苦精修有山人進而告之曰吾  
土有三元宮者奧區也創廢不可考止餘敗瓦頽垣  
矣師有意興復吾率子弟荷鋤以待乃鳩工庀材以  
次落成於是丹堊錯落山川生色矣是役也經始於  
天啟七年九月二十二日落成於崇正五年六月十  
八日爰勒貞珉以垂不朽

據碑

三皇廟在城外東南隅

自此至聖水寺創修其詳俱見舊志姑附於此

晏公廟在北門內晏公水神上臺下券乃會波晚照所由名也

火神廟在南門外崇正壬申十二月二十一日大火二日士民祈禳雲集德藩重修制復峻麗

張仙廟在北極廟東一在嶽廟後一在龍潭西

黑虎廟在東南城濠上懸崖下有泉匯為池廟翼其上其一在鵲華橋西

速現司廟在西關驢市北內祀張桓侯包孝肅廟前有坊

二郎廟在東門內兩隅頭西北

靈官廟在布政司西東向遙與關帝廟對

白衣菴在水月寺西

傅家寺在程家巷東

興福寺在高橋一在橋頭一在大新莊

丈八寺在溫家莊

紫微觀在柳埠今廢

太微觀在中宮東一名柳泉觀

崇寧寺在孫家閘西一在任家岸

宗教寺在懷家窪東

白雲寺在方家寨前

福聖寺在梁家莊

觀音寺在祝店一在甸柳莊一在鴨王口

釋迦寺在埧子屯東一在小官莊

三教寺在韓倉一在殷千戶莊一在小周莊

萬福寺在新店

洞正觀在展村今廢

普光院在老僧口

崇佛院在千佛山下崇宮廣宇勝壓南郊東有廣嗣巷  
每當令節士女如雲俗名下院



興國寺在任家岸河東

報恩寺在灤口

毘盧寺在田家莊一在曹家館

香山寺在泉瀘一名甘露今廢

千安寺在黑山寨東南今廢

崇興寺在楊家寨西今廢

棲霞觀在龍山鎮南

玉虛觀在左家莊

水潮菴在趵突泉東高臺聳峙踞山水之勝內祀觀音

大士額曰水月清境亦曰金地院

雲水菴在道溝內今廢

朱老菴在荻子峪

陰泉寺在城東南龍峪

廣嗣菴在速現司東

菩薩菴在柳埠東

八仙菴在馬跑泉東西營南菴

彌陀菴在姜家莊

鄉義寺在黑龍峪西頂

聖水寺在東務雞山下今廢上一石礎猶存

國朝

甘露禪林在西門內順治初建

採訪

毘盧菴在西關順治九年建

慈仁院在布政司街康熙初建

準提菴在西門內康熙初建

圓通菴在撫院前康熙初建

昇陽觀在大明湖西南道士劉某建

三元宮

孫光祀重建三元宮記畧會城南郭外正覺寺西三

元宮為泰安武舉人張所存重建舊宮在趵突泉西

肇有明正德間

十方院在南灘頭莊僧悟空建康熙庚申重修

### 聚德院

趙國麟新建聚德院記畧佛山下聚德院乃浙江張舜儀子希棻等建之以成父志者也舜儀性好善哀鰥寡振困窮力所能為孳孳不倦晚年欲建廟以祀神力不逮及屬纊時特以命其子希棻等卜地南營建諸殿閣予既稔悉舜儀之篤於善又嘉其子之能成父志也因詳誌之時康熙五十五年歲次丙申

天主堂在高都寺巷今廢

以上俱採訪

張篤慶歷下雜詩天主堂西西域胡行人猶解說耶

蘇烏斯梵唄來重譯田鵲衣裳徧九衢造化小兒藏  
繡幙壺邱仙客入元都名區像教紛綸甚妙相金輪

竟有無

范崑山房集